



宋元通鑑序



旂少讀二十一史苦其浩瀚既取荀悅袁宏

前後漢紀范祖禹唐鑑歐陽脩五代史讀之

各成一書咸可法戒然會而觀之猶若未備

及讀司馬光資治通鑑上起戰國下終五代

先後貫穿而一千三百六十二年之事迹燦

若指掌矣自宋以下雖有李燾之長編劉時

舉陳桎之續編而紀載失次筆削未當仍為

缺典于時不自揆量妄意刪述以紹司馬氏



之事而馳騫場屋勉就聲律將作復止旣而  
奔走仕途每携宋遼金元四史以行而簿書  
碌碌竟未遑也迺後視學浙中校士之暇雖  
嘗編次未有專功歲丙辰自鄜延放歸居閒  
無事得以研精竭慮熟復四史於凡宋元名  
人文籍家記野史罔不抉擿幽隱究悉顛末  
日夜手書五六年間積草綴稿堆几盈篋暮  
年衰力旋覺倦勤幾於棄置值王兵使道行  
朱郡守袵遣書史謄出旂乃復爲刪潤可疑

可信校計毫釐如是者又四五年乃始就緒  
追惟司馬氏振古鉅儒又助以劉恕范祖禹  
趙君錫之博雅歷十九年而其書始成猶謂  
中間牴牾不敢自保矧旂孤陋獨學無朋可  
以語此也哉但旂平生迂愚不敢隨人談笑  
蘇洵氏謂經以道法勝史以事詞勝而世儒  
相沿動謂經以載道史以載事不知道見於  
事事寓乎道經亦載事史亦載道要之不可  
以殊觀也故旂於是編凡有關於身心性命



之微禮樂刑政之大姦良邪正之辨治亂安危之機災祥休咎之徵可以爲法可以爲戒者皆直書備錄其義自見君臣士庶咸可鑒觀隨其所居各求盡分匪直可以資治而已至論其大可鑑戒者則宋初立國君子小人並用而君子多至擯斥小人多至顯融迨建中靖康間曾蔡之徒更迭爲相而南渡以後則汪黃秦湯韓史賈諸人相繼擅權內小人外君子遂致善類銷亡而士人無賴陳亮所

謂舉國之人皆風痺不知痛癢竟忘君父之大讐以是遼金雖滅元遂起而乘之而宋因以亡王通氏有言曰戎狄之德黎民懷之三才其舍諸噫此元之所以有天下而中國盡爲夷狄也既而天心厭亂篤生我

太祖高皇帝驅元漠北復我中夏然 聖度涵宏上契天心下究時事不以滅宋爲元忽必烈之罪而曰天命真人於沙漠即位之明年遂詔脩元史仰窺 淵睿豈但曰國可滅史



不可滅亦以見元之亂華皆本於宋之用匪  
其所致而千萬世之末鑑莫有大於是也  
故旂於宋元之際蓋重有感焉而參附遼金  
以爲是編誠有不能自己者矣及觀元儒揭  
傒斯有言曰脩史在於得人而學問文章而  
不知史事者不可與有學問文章知史事而  
心術不正者不可與旂俛思蚤歲涉獵子史  
則溺意詞章依傍經典則高談性命俱無裨  
實用晚雖稍知反約庶幾會歸于一而不能

附麗未及一二見諸行事竟懼沮尼邇幸泰  
道旋復優游於學稼灌園之暇而無所用心  
冉冉老矣不忍以藐焉之身終爲天地間之  
贅物以負覆載生成之德且回視宋元世代  
不遠人情物態大都相類書曰我不可不監  
于有夏亦不可不監于有殷宋元固今之夏  
殷也所宜爲監者蓋莫切於此矣是用黽勉  
以畢初志其於學問文章知史事雖未可妄  
議而心術則不敢不正但一得之愚上下於



宋元通鑑序  
四  
宋元四百八十二年之間成茲一百五十七卷之書僭踰之罪知不能免矣倘假我數年尚當再加叅校獻之

闕下以舒芹曝之忱茲懼率易姑以藏之家塾未敢上瀆也

皇明嘉靖丙寅十二月朔日前浙江按察司提學副使武進薛應旂序

宋元通鑑義例

鑑者監也備前代之善惡爲後世之法戒故不曰史而曰鑑者取斯義也文章固非所論然而文章亦自有不可廢者昔人謂司馬遷作史記叙三千年事五十萬言班固作漢書叙二百年事乃八十萬言煩省不同以是爲固不如遷愚則以爲遷固之優劣蓋自有在不在文之煩省間也故今歷覽宋元之史及諸名家紀錄及詔令奏疏議論啓劄有可爲世法戒者直掇全文多不裁減恐其抑而不揚則志意不舒事體不悉無以快心明目不能使



人感發懲創也

昔人謂文有屬對平仄用事者皆不可施於史傳以爲如黛粉飾壯士笙匏佐鼓聲爲此言者是蓋專意於爲文而非有志於經世者也君子爲天地立心爲生民立命爲往聖繼絕學爲萬世開太平不得已而爲文無非爲經世而作也藝文者但曰古文古文不知文不經世雖古何爲譬諸火化旣條何必茹毛飲血禮樂旣制何必儷皮土鼓矧文至於宋其施之郊廟朝廷宣之華夷臣庶者多爲四六之詞亦其一代之典章也雖司馬公不喜四六

亦未嘗沮朝廷不用抑他人不爲而歐蘇諸鉅公皆奉行如制程朱諸大儒咸遵行之若遂削而不書務模倣以擬遷固之文則非當時之實錄而一代之制度文爲亦何以考見也愚於宋以後之文章凡有關於世道可以垂鑒後人者多爲錄入要諸實事不在虛文也

春秋諸侯而或書其名大夫而或書其字或生而書其爵或卒而去其官論者以爲夫子之褒貶於是焉在也夫春秋大義炳如日星而其微詞變例美惡不嫌同辭則有非淺近之所能推測者後人脩



史輒從而擬之，不失之迂妄，則失之鄙陋。愚觀諸古，周公稱召公爲君奭，子思稱聖祖爲仲尼。左氏書孔丘卒，而不及其嘗爲司寇，則名字與官又曷足爲重輕哉？周濂溪曰：天地間至貴者人人而至貴者，以道德有於身而已矣。名字固不暇論。若以官爵爲重輕，則賢人逸士之高尚其志而不事王侯者，反隨世就功名者之不若矣。故愚於是編凡書卒者，其名字顯晦悉據其平生而並注之。其所重輕，蓋自有在，要不在於官爵之有無崇卑也。古者左史記言，右史記事，事爲春秋言爲尚書。經史

一也。後世史官咸推遷固然，一則退處士而進奸雄，一則抑忠臣而飾主闕。殆浸失古意，而經史始分矣。朱晦翁謂呂東萊好讀史，遂麓着眼。夫東萊之造詣，不敢妄議。若以經史分精粗，何乃謂精義入神之妙，不外於灑掃應對之間也。故愚於是編理學政治論次舊聞，凡事關體要言涉幾微者，並爲錄入。讀者當自得之，庶無伯恭之累也。

司馬溫公資治通鑑，倣春秋左傳編年例，以事繫日以日繫月，以月繫時，以時繫年。雖一事而始末序書先後不紊，蓋欲使後人考見時事，且以明實錄。



也後之纂脩者乃或合始末而併書之此紀傳體非編年例也故余於紀事仍序書於各年月日之下唯於名臣碩士之卒則合其平生而併書其大畧其有年月不可考見者則因事附書固不沒其善亦不掩微瑕庶俾後人知所法戒也

資治通鑑多致詳於名臣碩輔之經國政事而於儒學隱逸或從節畧愚於此則並著之庶窮達出處唯其道焉皆可以爲後訓也

君子小人大分自定但人非聖人則或不能每事盡善故仲尼好惡必察所以無誰毀誰譽而春秋爲公是公非之書也後之史官於衆所好者雖其事未必皆是而輒爲附和幾於佞史於衆所惡者雖其事未必皆非而務爲排擯幾於謗書愚惟博綜並觀據事直述而善惡自不相掩韓退之謂爲史者不有人禍必有天刑可不畏哉

道德功業相爲體用三綱五常原於天而備於人根於心而統於性情者其道德也體也舉而措之天下能潤澤生民歸於皇極發揮蘊奧協於訓典者其功業也用也所謂體用一原者也總名之曰道也古之聖賢達而在上則其道行窮而在下則其



道明君相師儒其究一也世降俗末偏蔽淺陋之徒各執已見依傍道德者則鄙功業爲庸俗馳騫功業者則斥道德爲玄虛持論相沿而道德功業岐而爲二甚至儒林道學宋史亦分爲兩傳矣不知儒非道學以何爲儒道學不謂之儒又以何者謂之儒哉宋初未有道學之名范希文在仁宗時以學職屬孫明復以中庸授張子厚於是徂徠有石守道蘇湖有胡翼之各以其學教弟子迨後周程繼起師友漸涵而道學日盛寔自希文倡之論者徒以希文功業之盛遂不得與道學並列夫謂

道學不必功業則可謂功業非道學則不可若謂功業非道學則堯舜禹湯文武之爲君夷夔伊傅周召之爲相皆不得謂之道學乎故愚於是編致詳於道學而凡有功業文章者雖其學有精麤純駁之不同亦並著於篇以爲經世者之法不敢不謂之學也

范淳夫作唐鑑每條輒爲論斷程伊川常置之几案蓋善之也竊謂是非之心人皆有之而天下後世自有公論不必皆自己出故於是編唯紀述當時言動不敢爲一人一家之見間或畧附數言亦采



公論非臆說也。

科目以得人爲先。某科得某人則書之。或於其卒年書之。若無名世之士則科目固在所畧也。

君子道其常變異在所不論。此固夫子不語怪之義也。論者謂左氏失之誣。以其有黃熊臺駘杜回伯有之類耳。但陰陽錯陳常變間值而氛祲妖異世或有之。夫子不語恐滋衆惑而垂之紀載亦示人以脩抹脩禳之道。故愚於此類不敢盡削也。

天下之道固一而無二。而精粗本末則不可偏廢。自夫朱陸之辨興而左朱右陸者。但知六經爲我注

脚而不究其義。矧於史學又何庸心。其或折衷於二者之間則亦謂讀經足矣。史固在所後也。明道程先生亦以謝上蔡爲玩物喪志。此其言蓋爲博而寡要者發也。未必謂屏經史而不讀也。邇者乃或妄意神化束書不觀。事至於前不學無術多至謬誤。而君子之經綸隳矣。君子之經世譬諸醫者之治病。經則其素難也。史則其方書也。雖軒岐和扁亦不能外是理。以生人而業其術者顧棄置之。縱自謂妙悟神解。其有不至於誤劑殺人者幾希。愚之此編欲後人監前人之轍迹以爲法戒而不



至於失身敗事要亦陸宣公集古方書之意也但宋以來脩日曆者惟據諸司之供報而不敢書所見聞甚至蔡卞蔡京之屬亦濫竽史職愛憎徇意變易是非朱子之在當時固已病之矧於數百年之後能盡得其實哉夫亦博采舊聞參考衆論傳信傳疑而不任己見庶幾其得之矣

元史備一代之始末於其太祖太宗定宗憲宗悉爲帝紀蓋紀傳之體也若通鑑編年則宋祚一日未亡當爲一日正統故於世祖十七年混一天下始爲元紀自茲以前則附於宋年號之下此續綱目

之義例蓋甚當也丘文莊世史正綱分書年號此固內夏外夷之義但宋祚旣亡而世祖偃然帝中國南北盡屬其疆理此亦氣數之一大變而天寔命之王宋二公纂脩元史悉大書年號蓋不沒其實亦紀異也况我

太祖高皇帝明言天命真人於沙漠宸衷睿旨豈無謂哉故愚於此不敢自用唯於順帝至正十二年我

太祖起兵之後則始以元主書之以見天命之有歸而元主至是不當稱帝矣



太祖高皇帝既言天命真人今公其言...  
實亦殊異也...  
命之王宋二公纂前代史悉大書半錄蓋不愛其  
因南北盡置其跡駐此亦余漢之一大變而天冥  
固內夏衣決之義曰宋新魏之而世既別然帝中  
之義曰蓋身當也立文藝世史五際全書半錄此

宋元通鑑目錄

宋元通鑑目錄

卷一

宋紀

太祖一

建隆元年

周恭帝宗

二年

三年

卷二

太祖二

乾德元年

二年

三年

四年

五年

卷三

太祖三



開寶元年

二年

遼景宗賢保寧元年

三年

四年

五年

六年

七年

卷四

太祖四

開寶八年

九年

十月以後太宗太平興國元年

卷五

太宗一

太平興國二年

三年

四年

遼乾亨元年

五年

遼乾亨二年

六年

遼乾亨三年

七年

遼乾亨四年

八年

契丹聖宗隆緒統和元年

卷六

太宗二

雍熙元年

契丹統和二年

二年

契丹統和三年

三年

契丹統和四年

四年

契丹統和五年

卷七

太宗三

端拱元年

契丹統和六年

二年

契丹統和七年

卷八

太宗四



淳化元年 契丹統和八年 二年 契丹統和九年

三年 契丹統和十年 四年 契丹統和十一年

五年 契丹統和十二年

卷九

太宗五

至道元年 契丹統和十三年 二年 契丹統和十四年

三年 契丹統和十五年

卷十

真宗一

咸平元年 契丹統和十六年 二年 契丹統和十七年

三年 契丹統和十八年

卷十一

真宗二

咸平四年 契丹統和十九年 五年 契丹統和二十年

六年 契丹統和二十一年

卷十二

真宗三

景德元年 契丹統和二十二年 二年 契丹統和二十三年

三年 契丹統和二十四年 四年 契丹統和二十五年

卷十三



真宗四

大中祥符元年 契丹統和二十六年

二年 契丹統和二十七年 三年 契丹統和二十八年

四年 契丹統和二十九年

卷十四

真宗五

大中祥符五年 契丹開泰元年

六年 契丹開泰二年 七年 契丹開泰三年

八年 契丹開泰四年 九年 契丹開泰五年

卷十五

真宗六

天禧元年 契丹開泰六年 二年 契丹開泰七年

三年 契丹開泰八年 四年 契丹開泰九年

五年 契丹開泰元年 乾興元年 契丹開泰二年

卷十六

仁宗一

天聖元年 契丹太平三年 二年 契丹太平四年

三年 契丹太平五年 四年 契丹太平六年

五年 契丹太平七年 六年 契丹太平八年

七年 契丹太平九年 八年 契丹太平十年



九年 契丹太平

卷十七

仁宗二

明道元年 契丹重熙元年 二年 契丹重熙二年

卷十八

仁宗三

景祐元年 契丹重熙三年 二年 契丹重熙四年

三年 契丹重熙五年

卷十九

仁宗四

寶元元年 契丹重熙七年夏元昊天授延祚元年

二年 契丹重熙八年 康定元年 契丹重熙九年

卷二十

仁宗五

慶曆元年 契丹重熙十年 二年 契丹重熙十一年

卷二十一

仁宗六

慶曆三年 契丹重熙十二年

卷二十二

仁宗七



慶曆四年 契丹重熙十三年 五年 契丹重熙十四年

卷二十三

仁宗八

慶曆六年 契丹重熙十五年 七年 契丹重熙十六年

八年 契丹重熙十七年

卷二十四

仁宗九

皇祐元年 契丹重熙十八年 夏諒祚寧國元年

二年 契丹重熙十九年 夏天祐垂聖元年

卷二十五

仁宗十

皇祐三年 契丹重熙二十年 四年 契丹重熙二十一年

五年 契丹重熙二十二年 夏福聖承道元年

卷二十六

仁宗十一

至和元年 契丹重熙二十三年 二年 契丹道宗洪基清寧元年

卷二十七

仁宗十二

嘉祐元年 契丹清寧二年 二年 契丹清寧三年 夏鞏都元年

卷二十八 三年 契丹清寧四年 四年 契丹清寧五年



卷二十八

仁宗十三

嘉祐五年

契丹清寧六年

六年

契丹清寧七年

七年

契丹清寧八年

八年

契丹清寧九年夏拱化元年

卷二十九

英宗一

治平元年

契丹清寧十年

二年

契丹咸雍元年

卷三十

英宗二

治平三年

遼咸雍二年

四年

遼咸雍三年

卷三十一

神宗一

熙寧元年

遼咸雍四年

二年

遼咸雍五年夏秉常乾道元年

卷三十二

神宗二

熙寧三年

遼咸雍六年

卷三十三

神宗三

熙寧四年

遼咸雍七年夏天賜國慶元年

卷三十四



神宗四

熙寧五年 遼咸雍八年

六年 遼咸雍九年

卷三十五

神宗五

熙寧七年 遼咸雍十年

八年 遼大康元年

卷三十六

神宗六

熙寧九年 遼大康二年 十年 遼大康三年

卷三十七

神宗七

元豐元年 遼大康四年 二年 遼大康五年

三年 遼大康六年

卷三十八

神宗八

元豐四年 遼大康七年 五年 遼大康八年

六年 遼大康九年

卷三十九

神宗九

元豐七年 遼大康十年 八年 遼大安元年

卷四十



哲宗一

元祐元年

遼大安二年夏  
天安禮定元年

卷四十一

哲宗二

元祐二年

遼大安三年夏  
乾順天儀治平元年三年  
遼大安四年

卷四十二

哲宗三

元祐四年

遼大安五年

五年

遼大安六年

六年

遼大安七年夏  
天祐民安元年

卷四十三

哲宗四

元祐七年

遼大安八年

八年

遼大安九年

卷四十四

哲宗五

紹聖元年

遼大安十年

二年

遼壽隆元年

卷四十五

哲宗六

紹聖三年

遼壽隆二年

四年

遼壽隆三年

卷四十六

哲宗七



元符元年 遼壽隆四年

二年 遼壽隆五年夏未安元年

卷四十六 三年 遼壽隆六年

卷四十七

徽宗一

建中靖國元年 遼天祚延禧乾統元年

卷四十八

徽宗二

崇寧元年 遼乾統二年夏貞觀元年 二年 遼乾統三年

卷四十九

徽宗三

崇寧三年 遼乾統四年 四年 遼乾統五年

五年 遼乾統六年

卷五十

徽宗四

大觀元年 遼乾統七年 二年 遼乾統八年

卷五十一

徽宗五

大觀三年 遼乾統九年 四年 遼乾統十年

卷五十二

徽宗六

政和元年

遼天慶元年

二年

遼天慶二年

三年

遼天慶三年

四年

遼天慶四年

卷五十三

徽宗七

政和五年

遼天慶五年 金太祖完顏  
旻收國元年 夏雍寧元年

六年

遼天慶六年 金收國二年

七年

遼天慶七年 金天輔元年

卷五十四

徽宗八

重和元年

遼天慶八年 金天輔二年

宣和元年

遼天慶九年 金天輔三年

二年

遼天慶十年 金天輔四年 夏元德元年

卷五十五

徽宗九

宣和二年

遼保大元年 金天輔五年

四年

遼保大二年 金天輔六年

卷五十六

徽宗十

宣和五年

遼保大三年 金天輔七年  
八月太宗晟天會元年

六年

遼保大四年 金天會二年

卷五十七

徽宗十一



宣和七年 遼保大五年  
金天會三年

卷五十八

欽宗一

靖康元年 金天會  
四年

卷五十九

欽宗二

靖康二年四月止 金天會  
五年

卷六十

高宗一

建炎元年 金天會五年西遼康  
國元年夏正德元年

卷六十一

高宗二

建炎二年 金天會  
六年

卷六十二

高宗三

建炎三年正月至六月 金天會  
七年

卷六十三

高宗四

建炎三年七月至十二月

卷六十四

卷五 高宗五

建炎四年 金天會八年

卷六十五

卷六 高宗六

紹興元年 金天會九年

卷六十六

卷七 高宗七

紹興二年 金天會十年

卷六十七

卷八 高宗八

紹興三年 金天會十一年  
四年 金天會十二年

卷六十八

卷九 高宗九

紹興五年 金天會十三年夏大德元年

卷六十九

卷十 高宗十

紹興六年 金天會十四年西遼感天后蕭氏咸清元年

卷七十

卷十一 高宗十一

紹興七年 金天會十五年



卷七十一 金天會十年

高宗十二

紹興八年 金天眷元年

卷七十二 金天會十一年

高宗十三

紹興九年 金天眷二年

卷七十三

高宗十四

紹興十年 金天眷三年

卷七十四

高宗十五

紹興十一年 金皇統元年

十二年 金皇統二年 西遼仁宗夷列紹興元年

卷七十五

高宗十六

紹興十三年 金皇統三年 十四年 金皇統四年 夏人慶元年

十五年 金皇統五年

卷七十六

高宗十七

紹興十六年 金皇統六年 十七年 金皇統七年

十八年 金皇統八年

十九年 金皇統九年十二月以後廢  
主亮天德元年夏天盛元年

二十年 金天德二年 二十一年 金天德三年

二十二年 金天德四年 二十三年 金貞元元年

卷七十七

高宗十八

紹興二十四年 金貞元二年西遼承天  
后耶律氏崇福元年

二十五年 金貞元三年 二十六年 金正隆元年

卷七十八

高宗十九

紹興二十七年 金正隆二年 二十八年 金正隆三年

二十九年 金正隆四年 三十年 金正隆五年

卷七十九

高宗二十

紹興三十一年 金正隆六年十月  
世宗雍大定元年

卷八十

高宗二十一

紹興三十二年 金大定二年

卷八十一

孝宗一



隆興元年 金大定三年

卷八十二

孝宗二

隆興二年 金大定四年

卷八十三

孝宗三

乾道元年 金大定五年 二年 金大定六年

三年 金大定七年

四年 金大定八年西遼主耶律直魯古天禧元年

五年 金大定九年

卷八十四

孝宗四

乾道六年 金大定十年 七年 金大定十一年夏乾祐元年

八年 金大定十二年 九年 金大定十三年

卷八十五

孝宗五

淳熙元年 金大定十四年 二年 金大定十五年

三年 金大定十六年 四年 金大定十七年

卷八十六

孝宗六

淳熙五年 金大定十八年

卷八十七

孝宗七

淳熙六年 金大定十九年 七年 金大定二十年

八年 金大定二十一年 九年 金大定二十二年

卷八十八

孝宗八

淳熙十年 金大定二十三年 十一年 金大定二十四年

十二年 金大定二十五年 十三年 金大定二十六年

卷八十九

孝宗九

淳熙十四年 金大定二十七年 十五年 金大定二十八年

十六年 金大定二十九年

卷九十

光宗一

紹熙元年 金章宗璟二年 金明昌二年

三年 金明昌三年 四年 金明昌四年

卷九十一

光宗二

紹熙五年 金明昌五年夏 宗純祐天慶元年



卷九十二

寧宗一

慶元元年

金明昌六年

二年

金承安元年

卷九十三

寧宗二

慶元三年

金承安二年

四年

金承安三年

五年

金承安四年

六年

金承安五年

卷九十四

寧宗三

嘉泰元年

金泰和元年

二年

金泰和二年

三年

金泰和三年

四年

金泰和四年

卷九十五

寧宗四

開禧元年

金泰和五年

二年

金泰和六年夏安全應天元年蒙古太祖元年

卷九十六

寧宗五

開禧二年

金泰和七年蒙古太祖二年

卷九十七

寧宗六

嘉定元年

金泰和八年蒙  
古太祖三年

二年

金主未濟大安元  
年蒙古太祖四年

三年

金大安二年夏皇建  
元年蒙古太祖五年

卷九十八

寧宗七

嘉定四年

金大安三年夏遵頊光  
定元年蒙古太祖六年

五年

金崇寧元年蒙  
古太祖七年

六年

金至寧元年九月以後珣  
貞祐元年蒙古太祖八年

卷九十九

寧宗八

嘉定七年

金貞祐二年蒙  
古太祖九年

八年

金貞祐三年蒙  
古太祖十年

九年

金貞祐四年蒙  
古太祖十一年

卷一百

寧宗九

嘉定十年

金興定元年蒙  
古太祖十二年

十一年

金興定二年蒙  
古太祖十三年

十二年

金興定三年蒙  
古太祖十四年

卷一百一

寧宗十



嘉定十三年

金興定四年蒙  
古太祖十五年

十四年

金興定五年蒙  
古太祖十六年

卷一百二

寧宗十一

嘉定十五年

金元光元年蒙  
古太祖十七年

十六年

金元光二年蒙  
古太祖十八年

十七年

金哀宗守緒正大元  
年蒙古太祖十九年

卷一百三

理宗一

寶慶元年

金正大二年蒙  
古太祖二十年

卷一百四

理宗二

寶慶二年

金正大三年蒙  
古太祖二十一年

三年

金正大四年蒙  
古太祖二十二年

卷一百五

理宗三

紹定元年

金正大  
五年

二年

金正大六年蒙  
古太宗元年

三年

金正大七年蒙  
古太宗二年

卷一百六

理宗四

紹定四年

金正天八年蒙古太宗三年

卷一百七

理宗五

紹定五年

金天興元年蒙古太宗四年

卷一百八

理宗六

紹定六年

金天興二年蒙古太宗五年

卷一百九

理宗七

端平元年

金天興二年末帝承麟元年蒙古太宗六年

卷一百十

理宗八

端平二年

蒙古太宗七年三年蒙古太宗八年

卷一百十一

理宗九

嘉熙元年

蒙古太宗九年二年蒙古太宗十年

卷一百十二

理宗十

淳祐元年

蒙古太宗十一年四年蒙古太宗十二年

卷一百十三

淳祐二年

蒙古太宗十二年三年



卷一百十三

理宗十一

淳祐四年

五年

卷一百十四

理宗十二

淳祐六年

七年

卷一百十五

八年

九年

卷一百十六

理宗十三

寶祐元年

二年

三年

卷一百十七

寶祐四年

五年

六年

卷一百十八

理宗十五

開慶元年

卷一百十九

蒙古定宗元年

二年

三年

蒙古定宗二年

三年

四年

蒙古定宗三年

四年

五年

蒙古定宗四年

五年

六年

蒙古定宗五年

六年

七年

蒙古定宗六年

七年

八年

蒙古定宗七年

八年

九年

蒙古定宗八年

九年

十年

蒙古定宗九年

十年

十一年

蒙古定宗十年

十一年

十二年

蒙古定宗十一年

十二年

十三年

理宗十六

景定元年 蒙古世祖中統元年

卷一百十九

理宗十七

景定二年 蒙古中統二年 三年 蒙古中統三年

卷一百二十

理宗十八

景定四年 蒙古中統四年 五年 蒙古至元元年

卷一百二十一

度宗一

咸淳元年 蒙古至元二年 二年 蒙古至元三年

卷一百二十二

度宗二

咸淳三年 蒙古至元四年 四年 蒙古至元五年

卷一百二十三

度宗三

咸淳六年 蒙古至元七年 七年 蒙古至元八年十一月改國號曰元

卷一百二十四

卷一百二十四



卷度宗四十四

咸淳九年 元至元十年

十年 元至元十一年

卷一百二十五

帝昞一

德祐元年 元至元十二年

卷一百二十六

帝昞二

德祐二年 五月以後端宗景炎元年元至元十三年

卷一百二十七

端宗

景炎二年 元至元十四年  
三年 五月帝昞祥興元年元至元十五年

卷一百二十八

帝昞

祥興二年 元至元十六年

卷一百二十九

元紀

世祖一

至元十七年

十八年

十九年

卷一百三十

世祖二

卷一百三十一  
至元二十年  
二十一年  
二十二年

世祖三  
至元二十三年  
二十四年  
二十五年  
卷一百三十二

世祖四  
至元二十六年  
二十七年  
二十八年  
卷一百三十三

世祖五  
至元二十九年  
三十年  
三十一年

卷一百三十四

成宗一

元貞元年  
二年

大德元年  
二年

卷一百三十五

成宗二

大德三年  
四年  
五年

成宗四  
六年

卷一百三十六

成宗三



大德七年

八年

九年

卷一百三十七

成宗四

大德十年

十一年

卷一百三十八

武宗一

至大元年

二年

卷一百三十九

武宗二

至大三年

四年

卷一百四十

仁宗一

皇慶元年

二年

延祐元年

二年

卷一百四十一

仁宗二

延祐三年

四年

五年

六年

七年

卷一百四十二

英宗一

英至治元年

二年

三年

卷一百四十三

恭定帝六年

七年

恭定元年

二年

三年

四年

卷一百四十四

恭定帝二年

致和元年

九月文宗圖帖睦爾即位改天曆元年

卷一百四十五

明宗二年

天曆二年

正月丙戌明宗即位未及改元八月庚寅暴崩己亥文宗復即位

卷一百四十六

文宗二年

至順元年

二年

三年

卷一百四十七

順帝四年

元統元年

二年

至元元年

二年

卷一百四十八

順帝二年

至元三年

四年

五年

六年



卷一百四十九

順帝三

至正元年

二年

三年

四年

五年

六年

卷一百五十

順帝四

至正七年

八年

九年

十年

卷一百五十一

順帝五

至正十一年

十二年

卷一百五十二

順帝六

至正十三年

十四年

十五年

卷一百五十三

順帝七

至正十六

十七年

卷一百五十四

順帝八

至正十八年

十九年

卷一百五十五

順帝九

至正二十年

二十一年

二十二年

二十三年

卷一百五十六

順帝十

至正二十四年

二十五年

二十六年

卷一百五十七

順帝十一

至正二十七年

戊申年

宋元通鑑目錄

宋元通鑑卷第一

明賜進士前中憲大夫浙江按察司提學副使兩京吏禮郎中武進薛應旂編集

明賜進士太中大夫陝西布政司參政前湖廣副使整飭蘇松常鎮岳陽曲王道行

明賜進士中憲大夫陝西按察司副使前知常州府事蘄水朱 珍校正

宋紀一

一起庚申至壬戌凡三年

太祖一

建隆元年

周恭帝宗訓元年周亡蜀主孟昶廣政二十三年南漢主劉鋹大寶三年北漢孝和

帝劉鈞天會五年南唐元宗李景十八年新大國一舊小國四凡五國吳越荆南湖南凡三鎮春正

月周殿前都點檢趙匡胤稱帝匡胤涿郡人四世祖

眇唐幽都令生珽唐御史中丞珽生敬涿州刺史敬



生弘殷周檢校司徒馬軍都指揮使弘殷娶杜氏生  
匡胤於洛陽夾馬營及長容貌雄偉器度豁如識者  
知非常人學騎射輒出人上漢初漫遊無所遇舍襄  
陽僧寺有老僧善術數顧曰吾厚贖汝北往則有遇  
矣會周祖以樞密使征李守真應募居帳下廣順初  
補東西班行首累官殿前都指揮使掌軍政凡六年  
數從世宗征伐荐立大功人望歸之詳見司馬光通  
鑑周世宗紀中世宗嘗於文書篋中得木牌長三尺  
餘題云點檢作天子時張永德爲殿前都點檢永德  
周懿親有功世宗疑之乃命匡胤代之及周恭帝宗

訓立加檢校太尉領歸德節度使時主少國疑中外  
密有推戴之意顯德六年冬十一月鎮定二州言北  
漢會契丹兵入寇至是月辛丑朔遣匡胤禦之殿前  
副都點檢慕容延釗將前軍先發都下謹言將以出  
軍之日冊點檢爲天子士民恐怖爭爲逃匿之計惟  
內廷晏然不知癸卯大軍繼發汴京軍校苗訓善觀  
天文見日下復有一日黑光摩盪者久之指示匡胤  
親吏楚昭輔曰此天命也是夕次陳橋驛將士相聚  
謀曰主上幼弱我輩出死力破敵誰則知之不如先  
立點檢爲天子然後北征未晚也都押衙李處耘具



以事白匡胤弟供奉官都知匡義及歸德掌書記趙普匡義普部分諸將環列待旦遣牙隊軍使郭延贊馳騎入京報殿前都指揮使石守信都虞候王審琦二人皆歸心匡胤者甲辰黎明將士逼匡胤寢所匡義普入帳中白之匡胤起諸將校已露刃列于庭曰諸將無主願冊太尉爲天子匡胤未及對即被以黃袍羅拜呼萬歲掖之乘馬還汴匡胤攬轡曰我有號令若輩能從我乎皆應曰願受命匡胤曰太后主上我北面事者不得驚犯公卿皆我比肩不得侵凌朝市府庫士庶之家不得侵掠用命有重賞違卽孥戮

汝皆載拜肅隊以行乙巳至汴自仁和門入先遣楚昭輔慰安家人又遣客省使潘美見執政諭意時早朝未罷聞變范質執王溥手曰倉卒遣將吾輩之罪也爪入溥手幾出血溥噤不能對侍衛親軍副都指揮使韓通自禁中惶遽而歸謀帥衆禦之軍校王彥昇追逐通馳入其第未及闔門爲彥昇所殺妻子俱死匡胤進登明德門令甲士歸營乃退居公署將士擁宰相范質等至質以義讓匡胤曰先帝養太尉如子今骨肉未寒而太尉若此柰先帝何匡胤流涕曰吾受先帝厚恩違負天地一旦至此君其謂我何質



等未及對，列校羅彥瓌按劍厲聲曰：我輩無主，今日必得天子，質知勢不可遏。曰：事已爾，無太倉卒。自古帝王有禪位之禮，今可行也。因具陳之。且曰：太尉既以禮受禪，則當事太后如母，養少主如子，無負先帝舊恩。匡胤揮涕許諾。然後召文武百官，至晡時，班定翰林承旨陶穀袖中出周主禪詔曰：天生烝民，樹之司牧，二帝惟公而禪位，三王乘時而革命，其極一也。予末小子，遭家不造，人心已去，天命有歸，咨爾歸德軍節度使，殿前都點檢趙匡胤，稟上聖之姿，有神武之略，佐我高祖，格于皇天，逮事世宗，功存納麓，東征

西怨厥績，懋焉天地鬼神，享于有德，謳歌獄訟，歸于至仁，應天順人，法堯禪舜，如釋重負，予其作賓。嗚呼！欽哉！祇畏天命，宣徽使引匡胤北面拜受，掖升崇元殿，服袞冕，卽皇帝位，易號周主，爲鄭王，符太后爲周太后，遷之西宮，大赦，改元建隆。以所領歸德軍在宋州，遂定有天下之號曰宋。遣使徧告郡國藩鎮，中外百官加恩進爵，有差。初，唐末，隱士陳搏字圖南，有經世之才，在長興中舉進士不第，遂不求祿仕。厭五代之亂，入武當山，脩神僊導養之術，能辟穀，或一睡百日不起。後隱于華山，自晉漢以後，每聞一朝革命，則



頓蹙數日人有問者瞪目不答常隨任俠百餘人往來出入嵩華關洛間至是方乘驢遊華陰市人相語曰趙點檢作天子搏曰天下自此定矣戊申贈周韓通爲中書令詔曰易姓受命王者所以應期臨難不苟人臣所以全節周故天平軍節度使檢校太尉同平章事侍衛親軍馬步軍副都指揮使韓通振迹戎伍委質前朝彰灼茂功踐更勇爵夙定交於霸府遂接武於和門艱險共嘗情好尤篤朕以三靈睠祐百姓樂推言念元勲將加殊寵倉惶遇害良用憮然可贈中書令以禮收葬欲加王彥昇擅殺之罪羣臣以

建國之始乞貫之帝猶怒故終身不得節鉞

辛亥

論翊戴功加周義爲殿前都指揮使石守信爲侍衛親軍馬軍都指揮使高懷德爲侍衛親軍步軍都指揮使張令鐸爲殿前都虞候王審琦爲右廂都虞候張光翰爲右廂都指揮使趙彥徽爲步軍都指揮使並領節鎮餘領軍者並進爵有差以弟光義爲殿前都虞候趙普爲樞密直學士時慕容延釗握重兵屯真定韓令坤領兵巡北邊帝遣使諭意許以便宜從事兩人皆聽命乃加延釗殿前都點檢令坤亦加侍衛都指揮使乙卯遣使分賑諸州己未以生日爲



長春節癸亥以周天雄軍節度使符彥卿雄武軍節度使王景定難軍節度使李彝興荆南節度使高保融及凡領節鎮者進爵有差已巳有司請立宗廟詔下其議兵部尚書張昭等請依隋唐以來立四親廟從之復詔議追尊四代號謚於是判太常寺竇儼上議尊高祖眇曰文獻皇帝廟號僖祖妣崔曰文懿皇后曾祖珽曰惠元皇帝廟號順祖妣桑曰惠明皇后祖敬曰簡恭皇帝廟號翼祖妣劉曰簡穆皇后考弘殷曰昭武皇帝廟號宣祖帝御崇元殿備禮冊命奉安神主于廟定制歲以四孟月及季冬凡五享朔望

薦食薦新三年一禘以孟冬五年一禘以孟夏是月視學詔增葺祠宇塑繪先聖先賢像自爲贊書于孔顏座端令文臣分撰餘贊屢臨視焉嘗謂侍臣曰朕欲盡令武臣讀書知爲治之道於是臣庶始貴文學二月乙亥尊母杜氏爲皇太后后定州安喜人治家嚴而有法生五子曰匡濟曰匡胤光義光美匡贊匡濟匡贊早卒陳橋之變后聞之曰吾兒素有大志今果然矣及尊爲皇太后帝拜於殿上羣臣稱賀后愀然不樂左右進曰臣聞母以子貴今子爲天子胡爲不樂后曰吾聞爲君難天子置身兆庶之上若治得



其違則此位可奪苟或失馭求爲匹夫不可得是吾所以憂也帝再拜曰謹受教帝嘗講求輔弼謂左右曰朕聞范質居第之外不殖貲產真宰相也是日以周司徒兼門下侍郎同平章事范質尚書右僕射兼門下侍郎同平章事王溥行中書侍郎同平章事魏仁浦樞密使吳廷祚並依前加官有差仁浦旣相僕射陶穀自言出於魏氏遂拜仁浦爲舅每見仁浦輒望塵下拜其便佞如此丙戌長春節賜羣臣衣各一襲舊制宰臣上殿命坐而議大政其進擬差除但入熟狀畫可降出奉行而已質等自以周朝舊臣稍存

徐亮  
徐亮

形跡且憚帝英睿乃請用劄子面取旨退各疏其事同列書字以誌從之坐論之禮遂廢庚寅賜貢士楊礪等十九人及第出身有差自是歲貢舉 三月乙巳改天下郡縣之犯御名廟諱者丙辰南唐主李景吳越王錢俶遣使以御服錦綺金帛來賀即位壬戌定國運以火德王色尚赤臘用戌遷周六廟于洛陽廟成遣官奉神主居之仍命郭玘以時饗祀 南漢主劉鋹殺其弟桂王璇興宦者陳延壽謂鋹曰先帝所以得傳位於陛下者由盡殺羣弟也勸鋹除去諸王鋹以爲然遂殺璇興由是上下怨而紀綱大壞



夏四月癸酉判太常竇儼上二舞十二樂曲名樂章  
乙酉幸玉津園遣使分詣京城門賜饑民粥丙戌浚  
蔡河癸巳周昭義軍節度使李筠起兵初帝即位時  
遣使加筠中書令使者至潞州筠欲拒之賓佐切諫  
乃延使者置酒既而取周太祖畫像懸于壁涕泣不  
已賓佐惶駭告使者曰令公被酒失其常性幸勿誅  
北漢主鈞聞之乃以蠟書結筠同舉兵筠長子守節  
泣諫筠不聽帝手詔慰撫且召守節爲皇城使遣歸  
謂筠曰我未爲天子時任汝自爲之我旣爲天子汝  
獨不能小讓我邪守節歸以白筠筠遂令幕府爲檄

數帝罪執監軍周光遜等送于北漢以求濟師又遣  
人殺澤州刺史張福據其城從事閻丘仲卿說筠曰  
公孤軍舉事其勢甚危雖倚河東之援恐亦不得其  
力大梁甲兵精銳難與爭鋒不如西下太行直抵懷  
孟塞虎牢據洛邑東向而聲大義于天下計之上也  
筠不能用北漢主自帥兵赴筠筠迎謁于太平驛言  
受周太祖恩不敢愛死北漢主與周世讐不悅其說  
因使其宣徽使盧贊監其軍筠見漢兵弱少而贊又  
來監心甚悔謀多不協乃留守節守潞而自引衆南  
向北漢主聞贊與筠異復遣其平章事衛融和解之



帝遣石守信高懷德擊之仍敕守信等曰勿縱筠下太行急引兵扼其隘破之必矣五月己亥朔日食以弟光美爲嘉州防禦使庚子遣慕容延釗王全斌將兵出東道與石守信會擊李筠癸卯石守信敗李筠于長平丁巳詔親征李筠以吳廷祚留守上都弟光義爲大內都點檢命韓令坤屯兵河陽己未帝發京師帥大衆前進山路險峻多石不可行帝先於馬上負數石將士因爭負之卽日平爲大道遂與守信等會丁卯李筠率衆迎戰石守信高懷德大破之擒其將范守圖殺北漢盧贊及援兵之降者數千人筠

走保澤州帝命列柵圍之六月辛未帝命將馬全義帥敢死士數十人攀堞而上遂入其城筠赴火死獲衛融融謂帝曰犬吠非其主汝宜速殺我我決不爲汝用帝怒以鐵搗擊其首流血被面融呼曰臣得死所矣帝曰忠臣也釋之以爲大府卿北漢主懼引師歸乙酉帝進伐上黨時筠子守節守之丁亥守節以城降赦之以爲單州團練使帝遂如潞州秋七月戊申帝自潞州還以大梁爲東京洛陽爲西京選諸州兵入衛詔殿前侍衛二司各閱所掌兵揀其驍勇者升爲上軍而命諸州長吏選所部內兵送都下以



補禁旅之闕。又選強壯卒定爲兵樣，分送諸道召募教習。俟其精練，卽送闕。由是獷悍之士皆隸禁籍矣。又懲唐以來藩鎮之弊，分遣禁旅戍守邊城，立更戍法，使往來道路以習勤苦，均勞佚。自是將不得專其兵，而士卒不至于驕惰。皆趙普之謀也。以趙普爲樞密副使。初，周世宗之世，帝帥師入滁，得判官趙普與語大悅，會獲盜百餘，帝將盡殺之。普請先訊，鞠然後決。所活者什七八。帝大奇其才，畱置左右。普幽州薊人也。乙丑，南唐進白金賀平澤潞，又進乘輿御服物。荆南節度使高保融卒，弟保勗權知軍府，請命于帝。

授以節度使，以竇儀爲工部尚書，罷學士兼判大理寺。奉詔重定刑統爲三十卷。八月辛未，遣郭玘饗周廟。壬午，以光義領泰寧軍節度，殿前都虞候甲申立琅琊郡夫人王氏爲皇后。九月癸卯，三佛齊遣使貢方物。壬寅，昭義節度李繼勳焚北漢平遙縣，俘獲甚衆。晉州鈐轄荆罕儒復率衆攻汾州，爲北漢大將郝貴超所襲，戰死。罕儒驍將，帝痛惜之，斬其部將不用命者二十餘人。己未，周淮南節度使李重進據揚州起兵，重進，周太祖之甥，與帝同事。周室分掌兵柄，常心憚帝。帝立，加重進中書令，移鎮青州。重進愈



不自安及李筠舉兵重進遣親吏翟守珣往潞陰結筠守珣素識帝乃潛詣京師求見帝問曰我欲賜重進鐵券彼信我乎守珣曰重進終無歸順之志帝厚賜守珣令說重進緩其謀無令二兇並作分我兵勢守珣歸勸重進未可輕發重進信之既而帝遣六宅使陳思誨賜之鐵券重進欲治裝隨思誨入朝左右沮之猶豫不決又自以周室懿親恐不得全遂拘思誨治城繕兵遣人求援于唐唐主以聞帝遣石守信王審琦李處耘宋偓等分道擊之趙普勸帝親征冬十月丁亥帝發汴十一月丁未至揚州圍城方重

進之起兵也有二子爲宿衛帝夜召面語之曰而父何苦爲此江淮兵弱又無良將誰與共圖事者汝速乘傳往曉之吾不殺汝也二子伏泣遂往至則重進方坐轅門與諸軍議事忽見二子且聞帝語皆相顧大駭士卒驚疑不測而有向背之意俄而宋師壓境城將陷左右欲殺陳思誨重進曰吾將舉族赴火死殺此何益即盡室自焚思誨亦被害帝入城戮同謀者數百人揚州平 史臣曰韓通死於宋未受禪之頃忠義之志明矣李筠李重進舊史書叛叛與否未易言也洛邑所謂頑民非殷之忠臣乎或曰三人者



嘗臣唐晉漢矣。曰：智氏之豫讓，非歟？李重進既平，帝令諸軍習戰艦于迎鑾鎮。南唐主李景大恐，遣使犒師，且使其子從鎰朝于揚州。南唐臣杜著、薛良以罪奔宋，獻平南策。景聞之，益懼。帝命斬著于下蜀，市配良隸廬州牙校。景稍安。十二月丁亥，帝還汴，授吳越錢俶天下兵馬大元師。俶自帝受命，貢奉有加。常數辛卯，唐泉州節度使留從效入貢稱藩。契丹兀律殺其叔父李胡，李胡子宋王喜隱輕慄無恒，謀反事覺，辭連李胡，遂死于獄。尋追謚曰章肅皇帝。

二年

五國三鎮

春正月，度民田。周世宗末年，嘗命官詣諸

州度民田，而使者多不稱。至是，帝謂侍臣曰：度田蓋欲勤恤下民，而民敝愈甚。今當精擇其人，遂分遣常叅官詣諸州，尋詔州縣課民種植。長吏以春秋巡視，著爲令。又置義倉，官所收二稅，每一石別輸一斗貯之，以備凶歉。遣使賜錢俶戰馬二百，羊五千，橐駝三十。二月癸酉，有司奏進士合格者十一人。中書舍人王著知貢舉。時亳州獻紫芝，鄆州獲白兔，隴州貢黃鸚鵡。著獻頌，因以規諫。帝嘉其意，下詔褒之。遣使監輸民租。先是，藩鎮率遣親吏視民租入，槩量增溢。公取餘羨符彥卿在天雄軍，取民尤悉。帝聞之，即遣



使諸州分主其事民始不困已卯賜符彥卿粟 初  
唐主李景之襲父位也屬中原多故盧文進李金全  
皇甫暉之徒皆奔于景跨據江淮三十餘州擅魚鹽  
之利即山鑄錢物力富盛頗有窺覷中原之志自周  
世宗平淮甸寢以衰弱帝既平揚州雖戮其亡叛景  
終不自寧乃遷豫章以太子從嘉守建康豫章城邑  
迫隘羣臣日夜思歸景怒欲誅贊行者帝遣通事會  
人王守正持詔撫之 三月丙申內酒坊火酒工乘  
火爲盜者五十人擒斬三十八人餘以宰臣諫獲免  
酒坊使左承規副使田處巖以酒工爲盜坐棄市閩

月以慕容延釗爲山南東道節度使時延釗自真定  
來朝韓令坤亦從討李重進還皆罷爲節度使自是  
殿前都點檢不復除授 夏四月癸巳朔日食壬寅  
詔郡國置前代帝王賢臣陵冢戶 五月癸亥朔以  
皇太后疾赦雜犯死罪以下 六月甲午皇太后杜  
氏崩后疾帝侍藥餌不離左右疾革召趙普入受遺  
命且問帝曰汝知所以得天下乎帝曰皆祖考及太  
后之餘慶也后曰不然正由周世宗使幼兒主天下  
爾若周有長君汝安得至此汝百歲後當傳位光義  
光義傳光美光美傳德昭國有長君社稷之福也帝



泣曰敢不如教后顧謂普曰爾同記吾言不可違也  
普即榻前爲約誓書於紙尾署曰臣普記藏之金匱  
命謹密宮人掌之遂崩 秋七月罷侍衛都指揮使  
石守信等典禁兵初石守信王審琦等皆帝故人  
有功典禁衛兵趙普數以爲言帝曰彼等必不吾叛  
卿何憂之深邪普曰臣亦不憂其叛也然熟觀數人者  
皆非統御才恐不能制伏其下則軍伍間萬一有作  
孽者彼臨時亦不能自由爾帝悟一日召普從容論  
天下之事因喟然歎息曰自唐季以來數十年間八  
姓十二君僭竊相踵朱全忠以宣武軍節度使起李

克用以河東節度使起石敬瑭自保義軍節度使篡  
唐劉知遠自忠武節度使篡晉郭威自天雄軍節度  
使篡漢兵革不息生民塗炭吾欲息天下之兵建久  
長之計其道何如普對曰陛下之及此言天地神人  
之福也節鎮太重唯稍奪其權則天下自安矣帝曰  
卿勿復言頃之帝因晚朝與石守信等飲酒酣屏左  
右謂曰朕非卿等不及此然天子亦大艱難殊不若  
爲節度使之樂朕終夕未嘗敢安枕卧也守信等請  
其故帝曰是不難知此位誰不欲爲守信等頓首曰  
陛下何爲出此言今天命已定誰復有異心帝曰卿



等固然其如麾下欲富貴何一旦有以黃袍加汝身汝雖欲不爲其可得乎守信等泣謝曰臣等愚不及此惟陛下哀矜指示可生之途帝曰人生如白駒過隙所以好富貴者不過欲多積金錢厚自娛樂使子孫無貧乏爾卿等何不釋去兵權出守大藩擇便好田宅市之爲子孫立未遠不可動之業多置歌兒舞女日夕飲酒相歡以終天年朕且與卿等約爲昏姻君臣之間兩無猜疑上下相安不亦善乎守信等皆謝曰陛下念臣等至此所謂生死而肉骨也明日皆稱疾乞罷典兵帝從之以守信爲天平節度使高懷

德爲歸德節度使王審琦爲忠正節度使張令鐸爲鎮寧節度使趙彥徽爲武信節度使皆罷宿衛就鎮賜賚甚厚唯石守信兼職如故其實兵權不在也壬申以弟光義爲開封尹光美爲興元尹以李漢超爲齊州防禦使尋命兼關南兵馬都監漢超在關南民有訟其疆娶已女爲妾及貸民錢不償者帝召訟者謂曰汝女可適何人對曰農家爾又問漢超未至關南時契丹何如對曰歲苦侵暴曰今復爾邪對曰無也帝曰漢超朕之貴臣汝女爲之妾不猶愈爲農婦乎且使漢超不在關南汝家尚能保其所有貨財邪



責其人而遣之。密使諭漢超曰：「亟還其女，并所貸朕姑貰汝，勿復爲也。不足於用，何不以告朕邪？」漢超感泣。由是益脩政理，吏民愛之。八月甲辰，南唐主李景卒。其臣桂陽郡公徐邈奉遺表來上。帝輟朝五日。遣鞍轡庫使梁義、吊祭，贈賻絹三千匹。景子煜時留建康，遂即位。又遣戶部尚書馮謐貢金器二千兩、銀器二萬兩、紗羅繒彩三萬匹，且奉父遺表，願追尊帝號。陳紹襲之意曰：「臣本於諸子，實愧非才。自出膠庠，心踈利祿。被父兄之蔭，育樂日月，以優游思追。巢許之餘塵，遠慕夷齊之高義。繼傾懇悃，上告先君，固匪

虛詞。人多知者，徒以伯仲繼沒，次第推遷。先世謂臣克習義方，旣長且嫡，俾司國事。遽易年華，及乎暫赴豫章，留居建業。正儲副之位，分監撫之權。懼弗克堪，常深自勵，不謂掩丁艱罰，遂玷纘承。因顧肯堂，不敢滅性。然念先世君臨江表，垂二十年中，間務在倦勤。將思釋負，臣亡兄文獻太子從冀將從內禪，已決宿心。而世宗敦勸旣深，議言因息。及陛下顯膺帝籙，彌篤睿情。方誓子孫，仰酬臨照。則臣向於脫屣，亦匪邀名。旣嗣宗祫，敢忘負荷。唯堅臣節，上奉天朝。若曰稍易初心，輒萌異志，豈獨不遵於祖禰，實當受譴於神



明方主一國之生靈遐賴九天之覆燾况陛下懷柔義廣煦嫗仁深必假清光更逾曩日遠憑帝力下撫舊邦克獲宴安得從康泰然所慮者吳越國鄰於敝土近似深讐猶恐輒向封疆或生紛擾臣即自嚴部曲終不先有侵漁免結釁嫌撓干旒辰仍慮巧肆如簧之舌仰成投杼之疑曲構異端潛行詭道願廻鑒燭顯諭是非庶使遠臣得安危懇帝許之優詔答焉煜乃謚景爲文孝皇帝廟號元宗陵號順陵煜初名從嘉聰悟好學善屬文工書盡明音律巳酉執易定節度使孫行友行友繼其兄方簡鎮易定踰八年狼

山佛舍妖黨益盛帝即位行友不自安累表乞罷不許行友懼乃繕甲兵將棄其帑還據山寨以叛兵馬都監樂繼能密表其事帝遣李懷節馳騎會鎮趙之兵僞稱巡邊直入定州行友不之覺既而出詔令舉族歸朝行友倉惶聽命既至訊之得實制削奪其官爵禁錮私第辛亥女真入貢女真之先居古肅慎地元魏時號勿吉至隋改號靺鞨唐初有黑水粟末兩部後粟末盛彊號渤海國黑水因役屬之渤海既滅黑水部民在南者繫籍于契丹號熟女真在北者不籍于契丹號生女真至是以馬入貢詔蠲登州沙門



島居民租賦令專治舟船渡其所貢馬庚申周世宗  
實錄成 九月壬戌朔南唐遣使進金銀繒綵戊子  
帝遣使南唐賻祭 冬十月丙午葬明獻杜太后于  
安陵癸巳南唐遣其臣韓熙載田霖來會太后葬丙  
申帝遣樞密承旨王仁瞻送南唐禮物 十一月甲  
子太后祔廟癸酉沙州入貢沙州本漢燉煌故地唐  
末以張義潮爲瓜沙節度至朱梁時張氏絕州人推  
長史曹義金爲帥義金卒子元忠繼有其地周授歸  
義軍節度使至是入貢 十二月壬申回鶻可汗景  
瓊遣使獻方物

三年

唐後主李煜元年  
是歲凡五國三鎮

春正月甲戌帝旣廣汴城且

命有司畫洛陽宮殿按圖脩之以韓重贇董其役營

繕旣畢帝坐寢殿令洞開諸門皆端直軒豁無有壅

蔽謂左右曰此如我心若有邪曲人皆見之矣 詔

郡國長吏勸民播種 二月甲午詔自今百官每五

日內殿起居以次轉對指陳時政得失事關急切者

許不時上章無以觸諱爲懼巳亥詔曰王者禁人爲

非乃設法令臨下以簡必務哀矜世屬亂離則糾之

以猛人知耻格則濟之以寬竊盜之生本非巨蠹近

朝立制重於律文甚非愛人之旨自今竊盜賊滿五



貫足陌者死壬午帝謂侍臣曰朕欲武臣盡讀書以通治道何如左右不知所對甲寅北漢侵潞晉守將擊走之三月戊午朔賈霜殺桑巳巳帝謂宰臣曰五代諸侯跋扈有枉法殺人者朝廷置而不問人命至重姑息藩鎮當如是邪詔申律文諭郡國自今決大辟錄案聞奏付刑部詳覆之禁民火葬以薛居正爲樞密直學士權知貢舉初平湖湘以居正知朗州會亡卒數千人聚山澤爲盜監軍使疑城中僧千餘人皆其黨議欲盡捕誅之居正以計緩其事因率衆翦滅羣寇擒賊帥汪端詰之僧皆不預賴以全活

夏四月乙未延州大雨雪丙申寧州大雨雪壬午丹州雪二尺是月唐清源節度使留從効卒子紹鑑典留務會吳越聘使至紹鑑夜召與燕統軍使陳洪進誣紹鑑謀附吳越執送建康推副使張漢思爲留後而洪進自爲副使以趙贊爲彰武節度使贊至延州前後分置步騎使綿綿不絕林莽之際遠見旌旗所部羗渾來迎莫測其數相視奪氣莫不畏服帝嘗注于謀帥命贊屯延州姚內斌守慶州董遵誨屯環州王彥昇守原州馮繼業鎮靈武以備西夏李漢超屯關南馬仁瑀守瀛州韓令坤鎮常州賀惟忠守易



州何繼筠領隸州以拒北敵又以郭進控西山武守琪戍晉州李謙溥守隰州李繼勳鎮昭義以禦太原其家族在京師者撫之甚厚郡中筦榷之利悉與之恣其圖回貿易免所過征稅令召募驍勇以爲爪牙凡軍中事許從便宜每來朝必召對命坐賜以飲食錫賚殊異由是邊臣皆富於財得以養募死力使爲間諜洞知蕃情每入寇必能先知預爲之備設伏掩擊多致克捷自此累年無西北之虞得以盡力東南取荆湖川廣吳楚之地太常博士聶崇義上三禮圖先是周世宗時將禘於太廟言享者以宗廟無祧室

不當行禘祫之禮崇義上言其畧曰魏明帝以景初三年正月上僊至五年二月祫祭明年又禘自茲後以五年爲禘且魏以武帝爲太祖至明帝始三帝未有毀主而行禘祫其證一也宋文帝元嘉六年祠部定十月三日大祠其太學博士議云按禘祫之禮三年一五年再宋高祖至文帝裁亦三帝未有毀主而行禘祫其證二也梁武帝用謝廣議三年一禘五年一祫謂之大祭禘祭以夏祫祭以冬且梁武乃受命之君裁追尊四朝而行禘祫則知祭者是追養之道以時移節變孝子感而思親故薦以首時祭以仲月



間以禘祫序以昭穆乃禮之經也非關宗廟備與未備其證三也終從崇義之議世宗詔叅定郊廟祭玉崇義因考正三禮至是表上之帝覽而嘉之詔曰禮器禮圖相承傳用寔歷年祀寧免差違聶崇義典事國庠服膺儒業討尋故實刊正疑訛奉職效官有足嘉者崇義宜量與酬獎所進三禮圖宜令太子詹事尹拙集儒學三五人更同叅議所冀精詳苟有異同善爲商確五月乙亥開太行運路詔增脩大內時太歲在戌司天監以興作之禁移有司毋繕西北隅帝按視見之怒問所由司天以其書對帝曰東家之

西即西家之東使二家皆作歲且將誰凶司天不能答於是即日泣撤一新之尹拙駁正三禮聶崇義復引經釋之下禮部尚書竇儀裁定儀上奏曰伏以聖人制禮垂之無窮儒者據經所傳或異年祀寔遠圖繪缺然踳駁彌深丹青靡據聶崇義研求師說耽味禮經較於舊圖良有新意尹拙爰承制旨能罄所聞尹拙駁議及聶崇義答義各四卷臣再加詳閱隨而裁置率用增損列於注釋共分爲十五卷以聞詔頒行之拙崇義復陳祭玉鼎釜異同之說詔下中書省集議吏部尚書張昭等奏議曰按聶崇義稱祭天蒼



璧九寸圓好祭地黃琮八寸無好圭璋琥並長九寸  
自言周顯德三年與田敏等按周官玉人之職及阮  
謏鄭玄舊圖載其制度臣等按周禮玉人之職只有  
璧琮九寸瑑琮八寸及璧羨度尺好三寸以爲度之  
文即無蒼璧黃琮之制兼引注有爾雅肉倍好之說  
此即是注璧羨度之文又非蒼璧之制又詳鄭玄自  
注周禮不載尺寸豈復別作畫圖違經立異四部書  
目內有三禮圖十二卷是隋開皇中敕禮官脩撰其  
圖第一第二題云梁氏第十後題云鄭氏又稱不知  
梁氏鄭氏名位所出今書府有三禮圖亦題梁氏鄭

氏不言名位厥後有梁正者集前代圖記更加詳議  
題三禮圖曰陳留阮士信受禮學於潁川綦冊君取  
其說爲圖三卷多不按禮文而引漢事與鄭君之文  
違錯正刪爲二卷其阮士信即謏也如梁正之言可  
知謏之紕謬兼三卷禮圖刪爲二卷應在今禮圖之  
內亦無改祭玉之說臣等參詳自周公制禮之後叔  
孫通重定以來禮有緯書漢代諸儒頗多著述討尋  
祭玉並無尺寸之說魏晉之後鄭玄王肅之學各有  
生徒三禮六經無不論說檢其書亦不言祭玉尺寸  
臣等參驗畫圖本書周公所說正經不言尺寸設使



後人謬爲之說安得便入周圖知崇義等以諸侯入朝獻天子夫人之琮璧以爲祭玉又配合羨度肉好之言彊爲尺寸古今大禮順非改作於理未通又據尹拙所述禮神之六玉稱取梁桂州刺史崔靈恩所撰三禮義宗內昊天及五精帝圭璧琮璜皆長尺二寸以法十二時祭地之琮長十寸以倣地之數又引白虎通云方中圓外曰璧圓中方外曰琮崇義非之以爲靈恩非周公之才無周公之位一朝撰述便補六玉闕文尤不合禮臣等竊以劉向之論洪範王通之作元經非必擬聖人之姿而居上公之位有益於

教亦爲斐然臣等以靈恩所撰之書聿稽古訓祭玉以十二爲數者蓋天有十二次地有十二辰日有十二時封山之玉牒十二寸圓丘之邊豆十二列天子以鎮圭外守宗后以大琮內守皆長尺有二寸又裸圭尺二寸王者以祀宗廟若人君親行之郊祭登壇酌獻服大裘搢大圭行郊奠而手秉尺二之圭裸獻九寸之璧不及禮宗廟裸圭之數父天母地情亦奚安則靈恩議論未爲失所以自義宗之出歷梁陳隋唐垂四百年言禮者引爲師法今五禮精義開元禮郊祀錄皆引義宗爲標準近代晉漢兩朝仍依舊



制周顯德中田敏等妄作穿鑿輒有更改自唐貞觀之後凡三次大脩五禮並因隋朝典故或節奏繁簡之間稍有釐革亦無改祭玉之說伏望依白虎通義宗唐禮之制以爲定式又尹拙依舊圖畫釜聶崇義去釜畫鑊臣等參詳舊圖皆有釜無鑊按易說卦云坤爲釜詩云維錡及釜又云漑之釜鬻春秋傳云錡釜之器禮記云燔黍捭豚解云古未有甑釜所以燔捭而祭即釜之爲用其來尚矣故入於禮圖今崇義以周官祭祀有省鼎鑊供鼎鑊又以儀禮有羊鑊豕鑊之文乃云畫釜不如畫鑊今諸經皆載釜之用誠

不可去又周儀禮皆有鑊之文請兩圖之又若觀諸家祭祀之畫今代見行之禮於大祀前一日光祿卿省視鼎鑊伏請圖鑊於鼎下詔從之六月壬子蕃部尚波干等爭採造務以兵犯渭北知秦州高防禦走之乙卯黃陂縣有象自南來食稼詔南唐主李煜應朝廷橫海飛江水闕懷順諸軍親屬有在江表者悉遣令渡江煜每聞朝廷出師克捷及喜慶之事必遣使犒師脩貢其大慶更以買宴爲名別獻珍玩秋七月庚申南唐遣其臣翟如璧貢金銀錦綺千萬壬戌放南唐降卒弱者數千人歸國八月乙未用



知制誥高錫言諸行賂獲薦者許告訐錫又上言請問法書十條以代試判詔今後應求仕及選人並試判三道仍復書判拔萃科 九月壬申脩武成王廟高錫上封事議武成王廟配享七十二賢內王僧辨以不令終恐非全德尋詔吏部尚書張昭工部尚書竇儀與錫重銓定功業終始無瑕者方得預焉秘書郎梁周翰上言曰臣聞天地以來覆載之內聖賢交鶩古今同流校其顛末鮮克具美周公聖人也佐武王定天下輔成王致治平盛德大勳蟠天極地外則淮夷構難內則管蔡流言寔尾跋胡垂至顛頓偃禾

什木僅得辨明此可謂之盡美哉臣以爲非也孔子聖人也刪詩書定禮樂祖述堯舜憲章文武卒以棲遲去魯奔走厄陳雖試用於定哀曾不容於季孟又嘗履盜跖之虎尾聞南子之佩聲遠辱慎名未見其可此又可謂其盡善者哉臣以爲非也自餘區區後賢瑣瑣立事比於二聖曾何足云而欲責其磨涅不渝始卒如一者臣竊以爲難其人矣昉自唐室崇祀太公原其用意蓋以天下雖大不可去兵域中有爭未能無戰資其佑民之道立乎爲武之宗覬張國威遂進王號貞元之際祀典益脩因以歷代武臣陪饗



廟貌如文宣釋奠之制有弟子列侍之儀事雖不經  
義足垂勸况於曩日不乏通賢疑難討論亦云折中  
今若求其考類別立否臧以羔袖之小疵忘狐裘之  
大善恐其所選僅有可存只如樂毅廉頗皆奔亡而  
為虜韓信彭越悉薶醢而受誅白起則錫劔杜郵伍  
員則浮尸江滋左車亦償軍之將孫臏實刑餘之人  
穰苴則償卒齊庭吳起則非命楚國周勃稱重有置  
甲尚方之疑陳平善謀蒙受金諸將之諉亞夫則死  
於獄吏鄧艾則追於檻車李廣後期而自剄竇嬰樹  
黨而喪身鄧禹敗於回溪終身無董戎之寄馬援死

於蠻徼還尸闕遣奠之儀其餘諸葛亮之儔事偏方  
之主王景略之輩佐閨位之君關羽則為仇國所禽  
張飛則遭帳下所害凡此名將悉皆人雄苟欲指瑕  
誰當無累或從澄汰盡可棄捐况其功業穹隆名稱  
烜赫樵夫牧稚咸所聞知列將通侯竊所思慕若一  
旦除去神位擯出祠庭吹毛求異代之疵投袂忿古  
人之惡必使時情頓惑竊議交興景行高山更奚瞻  
於往躅英魂烈魄將有恨於明時况復陛下厲軍  
威將遏亂略講求兵法締構武祠蓋所以勸激戎臣  
資假陰助忽使長廊虛邈僅有可圖之形中殿前空



不見配食之坐似非允當臣竊惑焉深惟事貴得中  
用資體要若今之可以議古恐來者亦能非今願納  
臣微忠特追明敕乞下此疏廷議其長不報 冬十  
月辛丑以趙普爲樞密使吳廷祚罷以普代之 遷  
故主周鄭王宗訓于房州 武平節度使周行逢卒  
子保權嗣保權年十一矣 十一月壬午賜南唐建  
隆四年曆 荆南節度使高保勗卒兄子繼冲嗣繼  
冲保融子也 十二月甲辰衡州刺史張文表襲潭  
州據之初周行逢病亟召將校屬其子保權曰吾部  
內兇狠者誅之畧盡唯張文表在耳我若死文表必

亂諸君善佐吾兒無失土宇必不得已當舉族歸朝  
無令陷于虎口及保權嗣位文表聞之怒曰我與行  
逢俱起微賤立功名今日安能北面事小兒乎會保  
權遣兵代永州戍道出衡陽文表遂驅之以襲潭州  
知留後廖簡素易文表不設備文表兵徑入府中簡  
方燕客醉被殺文表遂據潭州又將取朗陵以滅周  
氏保權遣楊師璠擊之且求援于宋 蜀主以用度  
不足始鑄鐵錢禁境內用鐵凡器用須鐵爲之者置  
塲推之以專其利又遣使督諸路累年逋負租稅龍  
游令田淳上疏言擾民犯天意聚財損君道語甚切



直蜀主不能用淳好談治亂大畧屢陳朝政闕失嘗  
言王昭遠伊審微韓保正不可當大任或勸以遜詞  
取貴仕淳曰大丈夫豈能附狗鼠求進哉 南漢內  
侍監許彥真既讒殺尚書右丞鍾允章威權與龔澄  
樞等澄樞忿其恣橫會有告彥真通先朝李麗姬者  
澄樞將按之彥真懼與其子謀殺澄樞澄樞使人告  
彥真謀反下獄族誅南漢主以李托爲內太師六軍  
觀軍容使初南漢主納托長女爲貴妃次女爲美人  
至是詔邦政皆稟托而後行

宋元通鑑卷第一

宋元通鑑卷第一  
山館鈔

